

定邊縣志

藝文志卷十三

前令徐觀海論曰文以載道一邑之掌故寄焉定邑僻處邊隅無名山大川供學士之制作即名公鉅卿憑軾而過率以塞雲邊月為愁苦之境多有擱筆者士生其間歷代厭於兵革鮮能援古證今扶輪大雅蓋地使然也

聖天子文教覃敷駸駸乎日臻於盛將必有名世者與關中競美焉錄條議詩文如千首亦以其有關一邑之故非徒以尚文也併錄碑記俾知各工創建興修之概耳

修議

定邊縣志

卷十三

藝文志 條議

一

定邊職業學校印

漢

虞詡議復三郡疏臣聞子孫以奉祖為孝君上以安民為明此高宗周宣所以上配湯武也禹貢雍州之域厥土為上且沃野千里穀稼既殷又有龜茲鹽池以為民利上郡龜茲縣有鹽官水草豐美土宜產牧牛馬銜尾羣羊塞道北阻河山乘隄據險因渠以溉水春河漕用功省少而軍糧饒足故孝武皇帝及光武築朔方開西河置上郡皆為此也而遭元元無妄之交衆羌內潰郡縣兵荒二十餘年夫棄沃壤之饒損自然之財不可謂利離河山之阻守無險之處難以為固今三郡未復安定北地郡園陵單外而公卿選懦容頭過身張解設難但計所費不圖其安宜開聖德考行所長

明

張鍊鹽法議夫食鹽山澤自然之利天下所以養民也上古無徵近古薄徵以佐國用要在先不病民而後利國為可貴耳關中食鹽一出於河東一出於花馬池一出於靈州一出於西章去三輔絕遠專供靈夏洮岷西北兵民之用無容議矣花馬池鹽北供延慶平三府寧榆二鎮南與河東鹽並行於三輔間河東鹽上下公行謂之官鹽花馬池鹽私相貿易謂之私鹽民間便於私鹽不便於官鹽者百年於茲矣必欲行河東官鹽其弊有四蓋行鹽郡縣各有分界所司徒知紙上陳跡河東鹽行三省不可越縮若究其實在山西河南未知何如其在關中自長安以西河東美鹽絕跡

定邊縣志

卷十三

藝文志 條議

二

定邊職業學校印

不至間有至者皆泥滓苦惡中人不以入口惟耕夫寡婦黽勉食之計其所售無幾也名雖謂行其實未嘗行之一也往來商人慮惡鹽不售告發郡縣使所在輦運外加樣鹽包封印計之及以給民封者自佳輦者自惡唱戶分鹽畏如飲鴆計賬徵價峻於正稅今雖暫止既為故事恐不能已二也商人賣鹽與販夫隨以小票鹽盡票不收毀官鹽不至西路則無票無票則通責店肆負販細人請東路自買未毀之票繳官公人亦幸得免責不問由來互相欺抵三也賈買票日久奸人依式私製盜賣僥倖者冒利敗露者破家雖有防禁迄今未已四也必欲禁花馬池私鹽其弊有五關中民貧衣食驅遣賦稅催切罄家所有走北地販鹽冀侷斗升之

利一為公人所獲則身入陷阱家計盡空一也貧人既為囚繫內無供餽冬月多斃於獄考驛遞囚販鹽徒居半死者又居強半民命可恤二也小販懼捕結聚大夥經山谿險要偶遇公人勢強則抵敵勢弱則冒險奔迸投崖落澗人畜死傷塗地三也公人與有力慣販者交關終歲不捕反為盜護惟單弱貧瘠者捕之或以升斗惡鹽強入路人筐袋執以報功使無辜受害四也衆役工食悉有定例惟巡捕工食私幫公費歲增十倍官吏比銷徒御勞瘁動經時月侯文曠職旅食空囊或罰或貨俱為無補五也夫物力不齊物之情也好美惡趨利就便民之情也所欲勿聚所惡勿施哀多益寡因俗成務司國計者之情也以物力言河東舊商帶支

定邊縣志

卷十三

藝文志 條議

三

定邊職業學校印

坐困新商超納無幾澆晒徒勞增課未減公私俱稱歎矣河東一池雖差大供三省則不足花馬二池雖差小供三郡二鎮則有餘自然之勢也以人情言河東鹽百方督之使行至以泥沙勒售假票甘罪而終不能行花馬池鹽百方禁之使不得行至於比屋破產接踵喪生而終不能禁者民之大欲大惡不可強也以國計河東歲課一十九萬有奇花馬二池歲課不盈數千河東鹽一引三錢有奇二池鹽一石六分有奇如是相懸者意河東與天下六運自祖宗朝俱有定額由來久遠二池迫近塞垣棄取不時故課亦微妙後來因循取足原辦而止耳夫河東鹽既不能及遠二池鹽卒不能禁民間又不可一日無鹽而盜買盜賣終非常理今當直

開二池鹽禁使西鳳漢中沛然通行計三府所當常食河東鹽一十二萬有奇歲課即照河東責三府代辦以其事權統歸河東巡鹽御史則達觀無異督禁有程兩地歲徵四鎮年例保無纖爽而關中可少事矣夫居害者擇其寡與利者取其多儻今不弛二池鹽禁則愚民被逮供餽為費罪贖為費奸人騙詐為費兵民歲增工食為費官吏比銷為費一切顯隱猥雜不可會計財足抵河東花馬二池正課出於千瘡百痛徒然費之而下殘民命上損國體又餘殃也儻今一弛二池之禁則愚民被逮供餽可省罪贖可省奸人騙詐可省歲增工食可省官吏比銷可省一切顯隱猥雜不可會計財足抵河東花馬二池正課出於不識不知漠然省之而

定邊縣志

卷十三

藝文志 條議

四

定邊職業學校印

下活民命上全國體又餘福也夫人情不甚遠比聞鹽法侍御皆一時英碩表表長者使其聞見悉如關中人習知其利害則亦何憚而不為良處哉但其受命而來也惟以行官鹽禁私鹽為職而反是則駭矣地非素履事未前聞雖聖人有所不知者何可遽望改易其常耶雖然安國家利百姓大夫出疆義也究理從長議政從便人心不昧因革有時此又關斯民之幸不幸也

王復整飭邊備疏延綏東自黃河岸府谷堡西止定邊營接寧夏花馬池東西縈紆二千餘里而多險隘境外臨邊無有屏障止藉墩臺城堡為守備舊城堡二十五處參差不齊烽火不接北面沿邊一帶墩臺稀疎空濶難以瞭望臣等計議府谷等十九堡俱係

極邊要地必增置挪移度幾可守府谷堡移出芭州舊城東村堡移出高漢嶺響水堡移出黑河山土門堡移出十頃坪大兔鶻堡移出響鈴塔白洛城堡移出甄營兒塞門堡移出務柳莊不惟東西直對捷徑而水草亦各利便內高家堡至雙山堡榆林城寧塞營安邊營定邊營相去隔遠合於各該交界地名崖寺子三眼泉柳樹澗瓦剎梁各添哨堡一座就於隣近營堡量撥軍官哨守又於安邊營起每二十里築墩臺一座共十座連接環縣俱於附近官軍量撥守瞭北面沿邊一帶空遠者各設墩臺一座共三十四座隨其形勢廣其規模度幾墩臺稠密營堡聯絡而緩急易於策應矣

定邊縣志

卷十三

藝文志 條議

五

定邊職業學校印

余子俊邊務疏先該臣等議得定邊新興安邊永濟四營堡俱係平漫沙漠去處難以打牆挑壕軍馬難於出入及鎮靖堡已行奏准挪回塞門今定邊等四營堡俱各挪移就險但定邊營接連寧夏花馬池營合當照舊不動止將新興堡挪於迤南古跡海螺城安邊營挪於迤南中山陂永濟堡挪於迤南上紅寺鎮靖堡不必挪回塞門却挪於迤北白塔澗口以守則固以戰則利其永濟安邊新興三處舊堡營房不許折動永濟新興城小常川輪撥官軍三隊安邊城大常川輪撥官軍六隊守護遇警或欲撲營按兵老家及把都河石澇池三山三堡俱係創設官軍數少又且全無器械及沿邊創修崖砦八百餘座器械亦無合當奏請頒給神鎗三

千把以備戰守

楊一清修理邊牆䟽延綏城堡據險寧夏甘肅河山阻隔賊難侵犯為患猶淺惟花馬池至靈州一帶地里寬漫城堡稀踈兵力單弱一或失守寇衆拆牆入犯誠非細故成化時寧夏巡撫徐廷璋修邊牆二百餘里開濬溝塹一道延綏地方邊牆壕塹又得巡撫余子俊修濬完固北丁不復入套者二十餘年世平人玩邊備稍踈連年擁衆拆入我軍動輒失利一二年來寇復大舉攻陷清水營殘破花馬池上厓宸慮敕臣經理臣自慶陽直抵靈州一帶邊牆城堡墩臺躬親閱視應廣集衆思始有定論其大要有四修濬牆塹以固邊防增設衛所所以壯邊兵經理寧夏以安內附整飭韋

定邊縣志

卷十三

藝文志 條議

六

定邊職業學校印

州以遏外侵當務之急莫先於此伏見受降城據三面之險當千里之蔽正統以來舍受降而衛東勝已失一面之險又輟東勝以就延綏則以一面之地遮千餘里之衝遂使河套沃壤為寇甌脫巢穴其中而盡失外險反備南河此陝西北邊之患所以相尋而莫之解也茲欲復守東勝因河為固東接大同西接寧夏使河套方千里之地歸我耕牧開屯田數百里用省內運及今將延綏寧夏一帶邊防設法整敕賊來有以待之或數十年未敢輕犯我得休養生息東勝之地未必終不可復也

涂宗濬邊鹽壅滯餉匱可慮疏延鎮兵馬雲屯惟賴召買鹽引接濟軍需歲有常額往時召集山西商人承認淮浙二鹽輸糧於各

堡倉結引前去江南投司領鹽發賣鹽法疏通邊商獲利二百年來未聞壅滯及至於今商人苦稱邊鹽不通引積無用其情甚苦其詞甚哀細詢其故蓋緣江南鹽官失政恣肆漁獵弊竇多端如邊鹽每引每包重止五百五十斤例也而彼鹽每引每包重至二千五百斤人情熟不欲利誰肯舍多而就少乎是彼得利四倍而邊鹽利少無人承買其困一也邊鹽堆積三四年發買亦例也而彼鹽朝中暮鬻無容堆積人情孰不急於趨利誰肯舍速而就緩乎是彼獲利捷徑而邊鹽遲滯無人承買其困二也鹽誌開載商鹽必挨單順序候鹽院委官盤掣而後發賣彼鹽不登單目任意中發既免守候之艱又無掣盤之費人皆樂趨所以邊鹽壅滯引

不得售其困三也且彼鹽發賣執有小票聯艘販運江浙吳楚之間何處不到夫行鹽之地有方食鹽之人有限彼之餘鹽既已盛行雖有邊鹽尋無買主其困四也先年鹽法通行或邊商安於故土不樂遠涉則有南商來邊收買鹽引引亦無壅今小票便而得利廣孰肯驅馳數千里遐荒之路而貿引乎近年以來塞上無南商之跡矣邊商迫於官刑納粟中引無人承買齎之江南株守累月盤纏罄盡雖減價而不得售其困五也邊方准鹽每引官價五錢并在彼加納餘價共七錢五分今江南價銀止得四錢四分是虧折本銀三錢一分邊方浙鹽每引官價銀三錢五分今江南價銀止得一錢六分是虧折本銀一錢九分然皆彊而後售共計淮

浙二十二萬六千餘引虧短價銀五萬七千餘兩四五年間不能周轉及至遠鄉債主逼索變產賠償其困六也如此六蠹率由私鹽徧行小票通而官引滯所以山西之商忿折資本盡歸原籍土著之商力窮難支逃亡過半止餘見在數家號呼告退新鹽引目節行催派并無一人承認三路鹽糧所藉以佐軍儲者盡化烏有司餉者日夜皇皇束手無策邊事至此深可寒心夫三軍之為國家効力者恃有此月餉耳月餉之所以充足者恃有此鹽商耳今南方鹽法阻滯商鹽不行鹽引不售鹽商不願赴邊納糧中引則軍餉所復出三軍枵腹荷戈何以責之竭力以禦意外之虞哉伏乞敕下戶部從長酌議務使鹽法疏通邊餉充足無狃目前之

定邊縣志

卷十三

藝文志 條議

八

定邊職業學校印

近永貽社稷之安熟數利害覆請施行

國朝

姜圖南酌釐湖茶并行邊茶疏茶法中馬故明舊有川茶漢茶湖茶川茶自隆慶三年題改折價臣前有蜀省文移一疏業經覆議行彼中撫按酌議開徵漢茶自萬曆十四年題改折價所有茶園茶課見在催徵冊報每歲招商散引前往漢南及湖襄收茶轉運官商對分以供招中耳顧漢南州縣產茶有限且層巖複嶺山程不便商人大抵浮漢江於襄陽接買臣衙門據引給票照驗比以湖襄水販店戶將茶斤貪圖價值專賣別省無引私販官商齎引無從收買臣查故明舊例湖茶通行各商招畢隨將引單號簿行

湖廣寶慶府轉發新化縣照引註定斤數多餘盡數抽稅該府仍委府佐一員監收接管嚴加盤驗如有低假茶戶牙行一體究處崇貞十五年題請在案今湖南茶法未能通行陝商統聚襄陽收買湖襄督催盤驗自不容已除漢中鞏昌兩刑官於湖茶照常盤驗外其襄陽收茶處所應請歲給官商引單號簿一冊於該府執對盤驗稽覈責有攸歸此所謂湖茶宜趲也至內地茶法故明嘉靖十五年御使劉良卿議酌西鳳等八府地方廣狹分派各府對半抽分照依時估定以價值商茶給商自賣外官茶價銀呈臣衙門計算或備軍儲迄萬曆十三年計小引茶西安行六萬斤漢中鳳翔行二萬斤今西漢二府尚行小商其對分官茶各交司中馬

定邊縣志

卷十三

藝文志 條議

九

定邊職業學校印

若延寧等處道里遼遠茶法久已絕響矣臣擬於榆林神木二道照舊小引例引茶百斤量入官茶三十斤額定每斤折價一錢三分報交延鎮官庫所過關津一體盤驗計榆延二處可行茶二十萬斤則由榆延以至寧夏俱可漸舉既以便民又復裕國此所謂邊茶宜行也蓋趲湖茶則商運速通邊茶則茶路廣斯實於目前茶法有裨者也

王廷弼屯政議古之實邊籌塞者莫不以耕屯為首務故有地而無人謂之守平虛有人而無食謂之與禍居是必耕之者衆而後民多紅粟之陳邊無懸釜之懼即遇軍興災告可免匱乏之憂又何有流離夫所與弄兵潢池者哉順奉戶部經理流民議修屯政

給資本寬賦徭制甚善而民甚更也但追榆綏三衛現荒屯地四萬二千一百餘頃皆處沿邊絕塞沙漠不毛初非平原沃野可以成賦中邦在昔止募商人輸粟於邊計其所輸而給鹽引商人饒其利招納貧民以事耕耘倉庾既盈地日墾闢兼有素裕之商又市粟屯民屯民者日不足而歲有餘者也春糶以十恒有不贖本之憂商之市者衆而穀踊矣穀踊而耕耨益勸矣迨至明季賤粟貴金遂徵銀而不徵粟商病而鹽政壞矣鹽政壞而屯地廢矣數十年來荆棘成林胼胝莫施今欲招一時饑饉之流民而屯久經廢棄之邊地竊恐勢所難行而民亦未必稱便且流移者之去留恒視年歲之豐歉故園各有恒產非若兵戈失業之流誰肯棄故

定邊縣志

卷十三

藝文志 條議

十

定邊職業學校印

土而事荒屯莫若將此地畝聽土著之民自墾不在牛種之給與不給而在薄賦寬徭倘不在三年起科之限例則民樂於播種矣不遽殿地方各官之功罪則官亦樂於招墾矣如有奸民棄熟就荒即繩以脫漏之條不數年間生聚招徠又安有失所之人與廢棄之地哉語曰藏富於民則國自富弭盜實邊莫善於此謹議

詩選

唐

張敬忠邊詩

五原春色舊來遲二月垂楊未掛絲只今河畔水開日正是長安花落時

李益登長城

漢家今上郡秦塞古長城有日天長慘無風沙自驚當今聖天子  
不戰四裔平

白居易城鹽州

城鹽州城鹽州城在五原原上頭蕃東節度鉢闡布忽見新城當  
要路金烏飛傳贊普聞建牙穿箭集羣臣君臣頰面有憂色皆言  
勿謂唐無人自築鹽州十餘載左衽氍裘不犯塞晝牧牛羊夜捉  
生常去新城百里外諸邊忽經來戍人惟此一道無烟塵靈夏潛  
安誰復辯秦原暗通何處見鄜州驛路好馬來長安藥肆黃耆賤  
城鹽州城鹽州鹽州未城天子憂德宗按圖自定計非關將畧與

定邊縣志

卷十三

藝文志 詩選

十一

定邊職業學校印

廟謨吾聞高宗中宗世北鄙猖狂最難制韓公創築受降城三城  
鼎峙屯漢兵東西互絕數千里耳鈴不聞邊馬聲如今邊將非無  
策心笑韓公築城壁相看養寇為身謀各握強兵固深澤願分今  
日邊將恩褒贈韓公封子孫誰能將此鹽州曲翻作歌詞聞至尊  
于瀆長城

秦王豈無德蒙氏非不武豈將版築功萬里遮胡虜團沙世所難  
作壘明知苦死者倍堪傷僵屍猶抱杵十年居上郡四海誰為主  
縱使骨為塵冤名不入土

宋

范仲淹秋思

漁家傲

塞下秋來風景異  
衡陽雁去無留意  
四面邊聲連角起  
千障裏長煙落日孤城閉  
濁酒一杯家萬里  
燕然未勒歸無計  
羌管悠悠霜滿地  
人不寐  
將軍白髮征夫淚

明

唐龍出塞二首

五鼓嚴軍令  
平明出塞行  
青霄橫殺氣  
白日振軍聲  
野濶千營肅  
秋高萬馬鳴  
單于皆遯北  
不用築長城

鼓角川原振旌旗  
日月明屯兵  
紅石峽斬將  
黑山城血染  
芹河赤氛收  
榆塞清陰山  
應有淚飛檄到神京

孫慎西巡邊

定邊縣志

卷十三

藝文志 詩選

十一

定邊職業學校印

長城迢遞接虹霓  
此日登臨信馬蹄  
秦地河山連草合  
漢家州縣入雲迷  
旌旗高出青霄上  
節鉞親持紫塞西  
自愧儒冠膺重寄  
願將方畧共封題

崔鏞塞上曲

鼓角聲喧塞日孤  
黃沙白草走單于  
大荒自古無分地  
指點而今入版圖

國朝

吳炳東定邊將軍

榆關飛雪滿輕裘  
射獵曾同出塞遊  
沙淨旌旗連上郡  
風高笳吹雜涼州  
別來蕭瑟空聞雁  
客去羈離倦倚樓  
月近賀蘭人獨遠  
何

時燒燭看吳鉤

郭指南塞門行

勞擾干戈二十年  
羸身日走萬山巔  
朝隨獬豸過塞門  
暮同雀鷺集沙田  
有妻有子添貧病  
心疆命弱空相競  
老親皤然為我慰  
幼兒啼饑向誰控  
去年洛濱移來此  
今年更入沙漠裏  
惟將書卷伴春秋  
滿引濁醪消我愁  
君不見鳴彝去後音  
書絕辟穀子房今亦休  
人生萬事終歸盡  
只此榮名天地留

郭允升把都河道中二首

長城關外暮飛雲  
蕭瑟秋風雁幾羣  
戍士牧兒頻借問  
只今誰是李將軍  
落日平沙接大荒  
蕭蕭衰草藉河隍  
受降城在今何處

定邊縣志

卷十三

藝文志 詩選

十三

定邊職業學校印

此地空題古戰場

張偉次定邊

連山奔冥漠  
朔氣結雲黃  
漢月千秋古  
秦城萬里長  
駝眠沙草煖  
鴈唳塞垣涼  
自惜兵戈地  
今為耕牧方

王際有邊地吟

從來征戰地  
落落幾人家  
有日猶飛雪  
無風亦起沙  
山城誰設市  
牧卒強排衙  
更有淒涼處  
春深不見花

王士禎輓定邊劉守備殉節

河套南來花馬池  
嚴城一夕滿旌旗  
驚傳絕塞豺狼窟  
坐失三軍熊狗姿  
恤緯孤魂留婦女  
成仁浩氣屬偏裨  
高牙大纛工翻覆  
請

視劉君墜淚碑

顧然定邊秋夜

暮上東城烽火樓漢家兵甲舊防秋只今牧馬常西度夜月空寒  
故壘愁

又塞下秋日

定陽秋嶺接風陰城下黃榆落葉深夜聽禁門歌唱發那知征客  
倍傷心

吳瑞偕趙總戎錢笠菴司馬觀鹽池

天工施變幻斥鹵作清湖岸積千山雪池生萬斛珠薦盤思古事  
裹箬笑山夫澤國同回首應知風味殊

吳與錢皆江南人

定邊縣志

卷十三

藝文志 詩選

十四

定邊職業學校印

徐洪懿塞外詩

絕塞少人跡征鞍却問途萬里隨地盡一鳥入林孤到處天空濶  
不知春有無行程何處宿鳴角起邊隅

張元弼塞外詩

昔觀滄海水今見塞垣煙風過塵吹浪春蒸氣接天馬蹄雲片起  
沙影月光連遊覽平生志襟懷一灑然

永佑新秋漫興

初秋風雨暗城闔塞上秋光莫比倫樹樹煙籠茅屋小山山雲覆  
亂峯勻到來真不隨時熱老去何妨為仕貧性淡那知秋意冷無  
邊清興喜方新

葉鈔到延安日謁見張午莊太守旋蒙柱駕見答即成

短裘匹馬到延安陳榻親登禮節寬豈有文章傾太守又勞冠蓋  
下閒官塵寰父老迎人問野店兒童駐馬看十七年來彈指事故  
人欣得復瞻韓鈔在都中嘗見太守於朱文正公邸第

又安塞山行

策馬纔過延水濱又隨鷗鷺入重雲迴峯路似腸千折絕壁人垂  
足二分去鳥影連蒼藹沒飛流響遏絳雲聞登高頻覓驚人句回

首雕陰已夕曛雕陰山在甘泉南

又靖邊道中

峯嶺盡重山萬綠無凝黛陟陰逾百尋已苦馬力殆奇峯拔地起

定邊縣志

卷十三

藝文志 詩選

十五

定邊職業學校印

峭立絕芥蒂振策上高層鼓勇氣什倍峯迴露傑閣突兀聳天外  
一線走蒼冥羣峯羅細碎饑鷹盤浮屠夕陽閃其背俯視疑有無  
遙空互明晦吾生飽行役輪蹄信所屆忻茲捧檄遊恢奇得勝概  
冥冥山霧重焔焔星芒大回首城兒窩地名烟波渺何在

又入定邊境口占

平沙踏盡馬蹄忙纔見荒城隱夕陽地近華離烟淡漠疆分夷夏  
日昏黃定邊與蒙古壤胡笳韻合車鈴動自寧條梁至定邊俱通車道晝夜鈴聲不絕野店

寒飄毳幕涼花馬池邊重回首風流何處學江郎  
又之任後邀同黃明府沛宋少府謙前署龔贊府啟宋協戎鉞解

都闈聖易宴飲即事

相逢都是宦遊人喜向源頭作問津接物莫先嚴克己和衷自要

結同寅遲吟黃綬青雲句先判回身動手因語林以回身作廉字解以動手作貪字解

予不負丞丞豈負哦松已遍牧龍濱

董彩虹夜半風止得雨定邑午夏天旱夜得雨口吟

久切雲霓望濃陰傍晚時幸緣風暫息乃趁夜潛施頓解禾麻困

還乘長養期深宵遙聽處仁愛仰天慈

又早從鹽場堡海眼取水是晚即雨

此水傳靈異淵淵不大津凌晨纔禱雨入夜恰隨人少府宋君黎明取水晚即

雨得赤子生鹽母天朝救旱臣休為漁利藪到處有明神

又連日身患熱疾

定邊縣志

卷十三

藝文志 詩選

十六

定邊職業學校印

虔禱隨傷暑微軀曠廢多雨日未到顯因同位切邑候赴郡少尹宋君朝夕進香

冥感 帝心和厚澤千山被公田萬姓歌繡衾身懶試喜雨效

東坡

宋謙甲戌八月四日同范邑侯掄策邀李廣文簡臣宋協戎鉞解

都閫聖易宋司廳大相李司廳成龍遊城北方家園集宴口占

爽籟增涼八月天來遊且喜繼羣賢非關春禊多佳日為慶秋成

樂有年地取芳園聊遠俗身閒寸晷亦同仙此間桃李栽培久座中

有以芳園擬者會看瓊開月下筵

又重九日同范邑侯復邀諸公集宴中門樓即事二首

同上高樓雅興長銜盃憑眺駐斜陽嵐凝遠塞煙光紫堞映平沙

曰色黃鴈字書來雲篆古酒兵談罷菊英香題糕自古稱佳節各把茱萸制錦囊

又折黃花當酒籌相逢人喜說重遊雲連北障龍沙峻簾捲西風

羊圈道圈讀倦羊圈山最道峻在邑之西南堪羨武功觀馬射何妨學士賦漁舟莫

將此會尋常視應識今秋勝去秋

又乙亥與黃邑侯分路編查保甲口占

保甲森嚴率舊章閭閻次第察須詳沙堤雨過行偏潤邊地風過沙塵滿目

是時多雨藉以滋潤茆屋煙微遠似藏邑民多在山溝壑居非歷其前屋舍不見猶若深藏自是編民

還按户行定章程十户一牌十牌一甲頓教弭盜即安良驅馳鄉國甘勞瘁月旦

於今愧頌揚

定邊縣志

卷十三

藝文志 詩選

十七

定邊職業學校印

又思位軒偶詠 二堂東軒為退憩之所額曰思位蓋取艮卦象

辭之義丙子歲謙在斯室增輯邑志

思惟素位理求殫無辱無榮作是觀世局如暮休亂着官場似戲且徐看居閒自得閒中樂守拙偏從拙處安每向公餘勤採輯從知稱職大為難

又定民苦况凡四野產苦菜咸采食之邊外沙蒿成米曰登粟歲歉輒以充饑鄉村水少而味甚鹵即鑿井亦十無一甘家各置窖貯夏雨冬雪其中雖雜污穢而舍此無可為水冬月煨炕皆牛羊馬糞臭氣亦所不計蓋習俗然也謙因分列其目詩以紀之

苦菜濟貧

野產乘時秀閭閻采采嘗調知羹味苦餐覺菜根香問俗挑宜早  
資貧願易償和甘逢歲稔此景未應忘

登粟療饑

未種能成粟天心愛育人論苗非上品充食亦忘貧穗比蜂窩近  
形同芥子真救饑猶竹實應感彼蒼仁

水窖需飲

汲飲宜先務僉籌積水盈鑿泉嫌斥鹵置窖利瓶甕事共饑寒用  
人忘雨雪并不須梅止渴會有化機生

煨炕禦寒

定邊縣志

卷十三

藝文志 詩選

十八

定邊職業學校印

栗烈寒何禦人憑火炕支爨憂薪不繼煨喜糞常宜日暖晴窓候  
陽回運泰時總然春有象餘况許誰知

又謙取定邑之勝蹟為八景各係以詩

南山積雪 縣治南山最峻山北雪積春融始消居民掃積水窖

需飲

突兀山形峻經冬雪嶂開天邊擎玉柱離位峙瑤臺遠靄迴巒聚  
祥光入座來應藏高尚土積水煮香醅

北塞層沙 塞外沙漠風捲層湧遂成陂隄

大漠颯時起長隄盡擁沙迴環山有跡飄逐浪生花雨過明如錦  
晴餘燦若霞霜天長望處月下亂飛鴉

紅柳映岸 縣屬西南紅柳溝街北龍王廟前水溝舊時兩岸紅柳掩映因為地名

本是蘇隄柳栽來此地同連村疑杏媚夾岸訝桃紅折染啼襟血飄迥舞袖風地名今視昔一望艷陽空

花馬名池 鹽場堡北有花馬大池本西秦牧地池產鹽前明天順中復以鹽易馬故名之

池也何名馬池開貿易通一泓光積雪千里影追風利牧傳秦伯和戎紀魏公魚鹽昭畫一歲獻五花驄

磚井泉湧 磚井堡城西舊有古井磚甃因名堡井泉汲之不竭不汲亦不溢其味甘美

定邊縣志

卷十三

藝文志 詩選

十九

定邊職業學校印

井渫經言汲邊城堡亦名澄泓泉既美甘冽取仍盈為有源頭活能教徹底清讓廉非敢擬守口却如瓶

石峽流長 洛源出縣東南琉璃廟石縫中廟西北有白露山即

山海經所云白於山水從此出經張千户岔與安花縣白豹川

河合流由保安靖邊安塞甘泉各縣界又歷鄜州雒川中部宜

君耀州白水同州府澄城朝邑入河

漫道中流細紆迴曲轉腸遠山縈帶迥古寺發源長別派原名洛歸河却是黃從茲放四海有本始無疆

奎星樓聳 城垣巽方設奎星樓配合角樓樓三層巍然聳峙

危聳東城上奎光挾斗分幾層連紫氣百尺上青雲金碧凝朝旭

高寒倚夕曛地靈人自傑領袖寄斯文

元帝臺高 縣城北街建元帝廟額紫極元宮為南山乾溝水直

衝縣城遂倚北添建三天門復築崇臺鎮之形勢完固

紫極當城北魏義殿宇開門還分上界閣亦在高臺瞻仰規模整

登臨氣脉培至今山水奠人唱壤歌來

邑廩膳生蘇大顯琵琶城懷古

空餘鴈齒啄山城狀若琵琶千載名指顧將軍桐柱在將軍山在

低徊姊妹鐵鞭橫勢昔胡女姊妹三入分據之交相應秋風天

外征鴻響暮雨河邊牧馬鳴暮雨城傍河記得勝蠻曾一曲當年

韓范戰功成文胡女三人後為宋范

定邊縣志

卷十三

藝文志 詩選

二十

定邊職業學校印